

詳註

孝

經



廣益

書
書
著
借

御註孝經

開宗明義章第一

開一經之宗本
明五孝之義理

仲尼居。曾子侍。

仲尼孔子字居謂問居曾子孔子弟子侍謂侍坐

子曰。先王有至德要道。

以順天下。民用和睦。上下無怨。汝知之乎。

古者稱師爲子先王謂先代聖王也德者

人生所得於天之性至德謂盡性之美造其極而無加也道者人所共由事物當然之理要道謂窮理之至舉其一而該衆也順天下謂順天下之人心因其固有而無所強也上下謂自天子至於庶人也孔子言古先聖王有至極之德切要之道以順天下而天下之民亦皆各得其心相親和睦上下尊卑無所怨尤此極隆之治也汝知之乎蓋孔子欲明孝道之大而先發端以問之也曾子避

席曰。參不敏。何足以知之。

參曾子名禮師有問則避席起答曾子聞孔子之言甚大且深故瞿然起敬避席立對言參不通缺何足

以知此義也

子曰。夫孝。德之本也。教之所由生也。

孔子因曾子之對遂告之以至德要道非

他即孝是也孝乃仁之本原仁乃心之全德仁主於愛而愛莫切於愛親故曰德之本本立而道生自然親親而仁民仁民而愛物舉天下之大無一物不在吾仁之中無一事不自吾孝中出故曰教之所由生可見行仁必自孝始而教化由此生焉所以爲至德要道也

復坐。吾語汝。身體髮膚。受之父母。不

敢毀傷。孝之始也。

曾子起對故使復坐以孝道甚大將詳以告之也始謂孝之根基也人子愛親必自愛身始蓋一身之四肢髮膚皆父母與我者父母全

而生之子當全而歸之朝乾夕惕不敢毀傷是爲孝之根基故曰始

立身行道揚名於後世以顯父母

孝之終也

終謂孝之完備也言不敢毀傷祇是不虧其體必須成立此身力行此道使善名揚於後代後之人稱其善而推本其父母之賢是光顯其父母也而後孝乃完備故曰

終夫孝始於事親中於事君終於立身

孝本愛親故以事親爲始移孝可以作忠故以事君

爲中忠孝道立方謂之揚名顯親故以立身爲終

大雅曰無念爾祖聿修厥德

大雅詩文王之篇周公追述文王之德以

告成王者夫子引此以見爲人子孫當念其祖宗而聿修其德則孝之道始可盡也

天子章第二

此章言天子之孝天子至尊故居五孝之首

子曰愛親者不敢惡於人敬親者不敢慢於人

愛者仁之端敬者禮

之端惡者愛之反慢者敬之反孔子首言天子之孝以爲天子以天下事親全在以兢業之心盡愛敬之道愛親者必能博愛不敢惡於人敬親者必能廣敬不敢慢於人推是以行則我所以愛人敬人者各得其宜而人之愛我敬我者亦無所不至矣

愛敬盡於事親而德教加於百姓刑於四

海蓋天子之孝也

愛親以及人之親則天下之人愛我而皆愛吾親矣敬親以及人之親則天下之人敬我而皆敬吾親矣愛以天下愛之至也敬以天下

敬之至也豈非愛敬盡於事親乎天子者天下之表也上行則下效君好則民從我之愛既盡則人亦興於仁而各愛其親矣我之敬既盡則人亦興於禮而各敬其親矣如是則百姓之眾四海之大同歸於孝

者乎此天子之

孝所以爲大也。甫刑云：一人有慶，兆民賴之。

甫刑即書經呂刑篇。一人謂天子。兆民謂百姓四海。孔子引呂

刑之言，謂一人有愛敬之善，則兆民皆仰賴之，以見天子合天下之孝以爲孝也。

諸侯章第三

此章言諸侯之孝。兼公侯伯子男。

在上不驕，高而不危，制節謹度，滿而不溢。

在上在一國臣民之上也。費用約儉，謂之

制節。慎行禮法，謂之謹度。諸侯爲一國之君，其位高矣。高者易危，若能不以尊自驕，位雖高不至於危。享一國之賦，其財滿矣。滿則易溢，若能制節以謹守侯度，財雖滿不至於溢。是知貴不與驕期，而驕自至。富不與侈期，而侈自生。

諸侯固當戒之也。

高而不危，所以長守貴也。滿而不溢，所以

長守富也。

居高位而不危，則不以陵傲召禍而致卑替。其位可長居矣。財充滿而不溢，則不以僭侈費財而致虛耗。其富可長有矣。蓋言不危不溢，其道行之可久也。富

貴不離其身，然後能保其社稷，而和其民人。蓋諸侯

之孝也。

社主神稷穀神，列國皆有社稷。其君主而祭之，諸侯之社稷，民人皆祖宗受之於天子，而傳之子孫者，故上承天子，下撫國人，必小心憂患，長守富貴，不離其身，然後能保守社稷。

而民人和悅，此

詩云：戰戰兢兢，如臨深淵，如履薄冰。

詩小雅小旻之篇，引此以見爲

諸侯者，常須戒懼，如臨淵，恐墜履，冰恐陷，方能不危不溢，以盡其孝道也。

卿大夫章第四

此章言卿大夫之孝卿與大夫不同而合言之者其行同也

非先王之法服不敢服。非先王之法言不敢道。非先

王之德行不敢行。

法服謂先王所制章服各有品秩也。法言謂禮法之言。德行謂道德之行。卿大夫事君從政承上接下服飾言行須遵禮典非法服而服

之是僭服非法言而道之是妄言非德行而行之是偽行三者皆於孝道有虧故敬慎守之而不敢違也

是故非法不言。非道不行。

口無擇言。身無擇行。言滿天下無口過。行滿天下無

怨惡。

是故其不敢之心不言則已言必守法不行則已行必遵道口之所言身之所行皆遵道法故無可擇言之多雖滿天下既有禮法自無有率口之過失行之多雖滿天下既有道德自不招

人之怨惡矣蓋三者之中言行尤爲切要故重言以明之也

三者備矣。然後能守其宗廟。此卿大

夫之孝也。

三者即服言行是也。禮卿大夫立三廟以祀先祖必三者無虧然後能保守宗祀卿大夫之孝當如是也

詩云。夙夜匪懈。

以事一人。

詩大雅蒸民之篇一人謂君也。引此以明爲卿大夫者能早夜不惰敬事其君則戒懼之心常存自無三者之失也

士章第五

此章言士之孝

資於事父以事母而愛同。資於事父以事君而敬同。

士始升公朝。離親入仕。家修而廷獻之。故言取於事父之行。以事母。則愛母與愛父同。取於事父之行。以事君。則敬君與敬父同。子未嘗不敬母也。而愛先之。母以鞠育而愛厚也。然充其愛母之心。承歡色養。不敢少違母意。非敬乎。臣未嘗不愛君也。而敬先之。君以尊高而敬生也。然揆其敬君之心。奔走服勤。不忍少負君恩。非愛乎。總之愛敬皆出於誠心。其自然之性情。有如此者。故分言以明其真摯之極。而其理未嘗不兼具也。

故母取其愛而君取其敬兼之者父也

此言事父之道兼愛敬也。爲臣

子者。於君與父母。其愛敬之心。原無分別。惟親至則敬不極。蓋言情親而禮節儀文之恭自少。非謂不敬也。尊至則愛不極。蓋言心敬而左右依戀之時不多。非謂不愛也。惟父則得朝夕奉養與母同。奉教稟命與君同。故言事父之道兼愛敬者。正以明愛敬之真心。俱有其極。無少虛偽之義。

故以孝事君則忠以敬事長則

順士初離膝下。方登仕籍。或未盡知事君事長之道。然而愛敬父母者。所謂孝也。以此孝道事君。則不忍欺君之心。即愛親之孝也。不敢慢君之心。即敬親之孝也。爲人臣而至於不忍欺不敢慢者。不謂之忠也。可乎。長謂卿大夫也。以事父兄之敬。用之事長。則此心常存。謹畏自不至有驕陵之心。悖慢之行。而同寅協恭。以爲師法。可謂順矣。究之忠順皆本於事親之孝也。

忠順不

失以事其上然後能保其祿位而守其祭祀蓋士之

孝也

上菴君長而言。士亦得立宗廟。祀其先祖。言能合忠與順而不失其道。以事君與長。則君諒其忠。卿相樂其順。然後能保其俸廩之祿。官爵之位。而永守祖先之祭祀。蓋士無田則不祭。故祿

位與祭祀相關而

詩云夙興夜寐無忝爾所生

詩小雅小宛之篇。所生謂父母。引此以見爲士者當

小心勉力早起夜寐求無辱其父母而無辱之道則在於忠順不失也

庶人章第六

此章言庶人之孝

用天之道分地之利

庶人服田力穡舉農畝之事順四時之氣春氣發生則當耕種夏氣長養則當芸苗秋氣收斂則當割穫冬氣閉塞則當蓋藏

推之凡事而必順時此用天道也分別山林川澤邱陵墳衍原隰五土之高下隨其地之宜產者而播種之此分地利也不順天道則先時後時而物無以生不辨地利則終日勤動而物終不成二者皆得則生植成遂衣食自然充裕矣

謹身節用以養父母此庶人之孝也

衣食既足仰足以身事父母而父

母安之即俯足以育妻子而樂我妻孥父母之心亦用慰也然凡人之情稍充裕則多生事尤必謹身守法不敢放縱以速恥辱罪戾而不遺父母之憂且財有餘則易耗費又當省儉用度不敢奢侈公賦既完私用不窘以無闕二親之奉如此養其父母不徒口體之養即謂之養志亦可庶人之孝誠當如是也

故自天子至於庶人孝無

終始而患不及者未之有也

上自天子下至於庶人雖有尊卑之分其根於一本之天性則一也孝雖有五等之別其所以

各盡其道以抒其不能自己之情則一也若心欲行孝則隨所處而皆可以自盡蓋自有身以後無日非為人子之日則無日非當盡此孝道之時豈有久暫之殊姑待之日而以力不及為患者此必無之理也為人子者貴賤貧富皆當自勉不可以所遇不同而生怠緩之心也

三才章第七

此章言孝道之大及本孝立教之義天地人謂之三才

曾子曰甚哉孝之大也子曰夫孝天之經也地之義

也民之行也。

曾子平日以保身爲孝。不知孝之通於天下。無限尊卑。故聞夫子之言。始知孝道之大。遂歎美之。而夫子遂言民性之孝。原於天地。天之三光有度。而以生物。

履轉爲常。故曰經地之五土有性。而以承順利物爲宜。故曰義得天之性爲慈愛。得地之性爲恭順。是即孝也。孝爲百行之首。人所當常行者。故曰民行由是觀之。孝合三才以爲大。在天爲經。在地爲義。在民爲行其實則一理也。

天地之經而民是則之。則天之明。因地之利以

順天下。是以其教不肅而成。其政不嚴而治。

凡民生於天地之間。稟天地之

性。天地既具此經常之理。人法天地亦當以此爲常行也。夫民自初生以來。皆知愛親愛親之心。即孝也。然此愛親之心。有不知其然而然者。窮之而無原。執之而無體。用之而無盡。廣大而無際。豈非天地之經乎。但民不能自法天地。全賴聖人倡之。聖人則天之明。承三光紀四時。而民皆出作入息。始知夙興夜寐。無忝爾所生。因地利。辨五土。播百穀。而民皆耕田鑿井。始得晨羞夕膳。敬養無違。是統因夫天地自然之道。以順天下人民。孝養愛敬之心。而立政教。實聖人之事也。惟其政教既順於人心。是以人皆樂從。教則不待肅戒而自成。政則不待威嚴而自治。其化之神有如此者。是益知孝者。天性之自然。人心所固有。聖人之政教。所以云順天下也。

先王見教之可以化民也。是故先之以博愛。

而民莫遺其親。陳之以德義。而民興行。先之以敬讓。

而民不爭。道之以禮樂。而民和睦。示之以好惡。而民

知禁。

政教皆可以化民。而本孝之教。其化尤神。先王知此教本於天地。易於化民也。是故以身先之。人君愛其親。而推此愛親之心。以博愛其民。民皆法則之。施由親始。無有遺棄其親者矣。陳說。

德義之美以感動民心民皆興起於躬行而無有甘於自棄者矣又身行敬讓以率先天下而民皆讓路讓畔無有陵競之行矣復導民以禮正其身而節其行導民以樂平其心而怡其情禮樂兼備内外交養民皆和順親睦而無乖戾之心矣又示之以善之當好惡之當惡好則有慶賞惡則有刑威民遂知有禁令而不敢犯矣凡此者皆因天地以順天下之事而教化之捷應如此又何疑於孝治之大也詩云赫赫師尹民具爾瞻詩小雅節南山之篇師尹周太師尹氏也引此謂師尹不於化民成俗乎由是而知教明於上化行於下觀感興起之益良匪淺也

孝治章第八

此章言由孝而治之義

子曰昔者明王之以孝治天下也不敢遺小國之臣而況於公侯伯子男乎故得萬國之歡心以事其先王此言天子之孝治也昔者明哲之王以孝道而治理天下也推其愛敬之心至於附庸小國之臣尚不敢遺忘以闕其禮況於公侯伯子男五等之君乎以此之故舉天下萬國之眾而皆得其歡悅之心尊君親上同然無間人心和而王業盛社稷靈長而宗廟奠安以此奉事其先王則孝道至矣夫子所以首稱明王而言其不敢者蓋即不敢惡慢於人之心也明王聯天下為一身大國小國之君臣是吾四肢百骸也億兆之民是吾髮膚也鰥寡鰥獨顛連無告者是吾膚理之病癢而不甯者也明王不敢遺小國之臣即不敢忽邱民侮鰥寡虐無告何也所以敬吾身也敬吾身所以敬吾親矣故天下之人莫不尊親所謂以天下尊養者也夫堯舜之道孝弟而已然以欽明溫恭開萬世治道之源可見孝道即治道統不外此一敬己爾治國者不敢侮於鰥

寡而況於士民乎。故得百姓之歡心。以事其先君。

此言諸侯

之孝治也。諸侯法天子。而以愛敬治其國。尚不敢悔慢於無妻之鰥。無夫之寡。況知禮義之士。與効力之民乎。以此之故。所以得百姓之歡心。而和其民人。保其社稷矣。以此而事其先君。豈非孝道之大者乎。蓋不敢悔鰥寡。即不驕不溢之極得。百姓之歡心。即長守富貴之本也。

治家者不敢失於臣妾。而況於妻

子乎。故得人之歡心。以事其親。

此言卿大夫之孝治士庶人亦可推而知也。卿大夫以孝治其家者。推其愛敬之心。

下及於臣妾之疏賤者。尚不敢少失其心。而況於妻子之親且貴乎。以此之故。無貴無賤。無親無疏。皆得其歡心。而可以事其父母矣。蓋君子之道。莫大乎孝。孝之本莫大乎順親。故仁人孝子。欲順乎親。必先於妻子不失其好。兄弟不失其和。以至一門之內。上下尊卑。秩然雍睦。然後可養父母之志。而無違也。治家者可不慎乎。

夫然。故生則親安之。

祭則鬼享之。是以天下和平。灾害不生。禍亂不作。故

明王之以孝治天下也如此。

天子諸侯卿大夫以孝治天下。國家而皆得其歡心。以事其親。誠如是也。親生而存。則安其養。

而心志康泰。非徒甘旨之具也。親歸而鬼則享其祭。而神明咸格。非徒陳薦之文也。總由於心志之素安。所以神氣之是感也。是以普天之下。和氣洋溢。蕩蕩平平。無乖戾之氣。則水旱疾疫之灾害。自然不生。無陵悖之行。則盜賊干戈之禍亂。自然不作。蓋以天子身率於上。諸侯以下。化而行之。人人盡孝。則心和氣和。而天地之和應之也。明王之躬行愛敬。而神人上下靡不感悅。神效如此。豈非孝治之所極隆者乎。

詩云。有覺德行。四國順之。

詩犬雅抑之篇。引此言天子有明大之德行。則四方之國皆順從之。蓋天子以至德要道。順天下四方皆

感之而無不順，乃理勢之必然。孝治之所以易於化民也。

聖治章第九

此章言聖人治世之要道

曾子曰：敢問聖人之德，無以加於孝乎？子曰：天地之性，惟人爲貴。人之行，莫大於孝。

曾子既問孝治之大極至之效，以爲政教之隆皆本於德，故問聖人之德果無以加

於孝乎？夫子以爲天以陽生萬物，地以陰成萬物，天地之生成萬物者，雖以陰陽之氣，然氣以成形，而理亦賦焉。人與物均得天地之氣以成形，秉天地之理以成性，物得氣之偏，其質蠢人得氣之全，其質靈。是以人能全其性，則與天地參爲三才，而物不能也。故天地之性，惟人爲貴，而人以人之行言之，則莫大於孝。何也？人之所以貴者，以此性也。性之德爲仁，仁爲人心之全德，主於愛，而愛莫切於愛親。故人之百行，以孝爲先，能孝即仁人，仁者必孝，此所以行莫大於孝也。

孝莫大於嚴父，嚴父莫大於配天，則

周公其人也。

孝之大無所不至，而莫大於尊敬其父。尊敬之禮無所不至，而莫大於以父配享上天，惟天爲大，至尊無對，而以己之父配之，則尊敬之者至矣。仁人孝子愛

親之心，雖則無窮，而立綱陳紀，制禮之節原自有限，謂父爲天，古今所同，求其盡孝之大，而得自遂其心，行以父配天之禮者，則始自周公。故曰：其人也。蓋自武王有天下之後，周公始制此禮，以尊敬其父文王也。

昔者周公郊祀后稷以配天，宗祀文王於明堂以

配上帝，是以四海之內各以其職來祭。夫聖人之德

又何以加於孝乎。

郊圖丘祭天也。后稷周之始祖也。宗祀謂別立一廟爲百世不祧之宗也。明堂天子布政之宮也。其制後爲室前爲堂室幽暗堂顯明享

人鬼尚幽故於室祀天神尚明故於堂上帝即天也。郊則尊之而曰天以形體言也。堂則親之而曰上帝以主宰言也。配天謂冬至祀天於圜丘以始祖后稷配享也。周公輔成王制禮作樂以萬物本乎天文武功本乎后稷因祭天於郊乃尊始祖后稷以配天萬物成形於帝人成形於父因祭上帝於明堂乃尊父文王以配上帝此報本反始之禮所以爲治天下之大經也。周公之尊其祖父者如此是以德教形於四海四海之內爲諸侯者各以其職分所當然咸來助祭敬供郊廟之事矣。孝德之感人至此之極由是觀之聖人之德誠無以加於孝也。

故親生之膝下。

以養父母日嚴聖人因嚴以教敬因親以教愛聖人

之教不肅而成其政不嚴而治其所因者本也。

此承上言聖人之德

無加於孝而聖人之教人以孝亦非有所強拂也。凡人親愛之心生於童幼當嬉戲於父母膝下之時便知親愛父母比及稍長漸知禮義則其奉養父母也日加尊嚴於一日此人之本性良知良能也而聖人之教因其日嚴之心而教之以敬恐其狎恩恃愛而易失於不敬也因其親之心而教之以愛恐其尊敬過恭而至於疏也。夫愛敬無所待教而此言教愛敬者樂記曰禮者爲異樂者爲同同則相親異則相敬樂勝則流是愛深而敬薄也。禮勝則離是嚴多而愛少也不教敬則不嚴不和親則忘愛愛敬雖人所同具聖人恐其溺欲而忘本故教之也。然亦不過啟其良心因其本性非有所待於外也。故其教則不待肅而自成其政不待嚴而自治以其所因者愛敬之本心天性之固有也。

父子之道天性也君臣之義也父

母生之續莫大焉君親臨之厚莫重焉。

父子之道其親也天性然也雖有強暴之人見子則

憐至於極祿之兒見父則笑果何爲而然哉此父子之道所以爲天性而不可解也父慈子孝乃天性之本然加以日嚴又有君臣之義然亦天分之自然也夫人子之身氣始於父形成於母其體本相連續從此一氣而世世接續爲親之枝上以承祖考下以傳子孫人倫之道至親之續孰大於此惟其至親也所以至尊易曰家人有嚴君焉父母之謂也父母既爲我之親又爲我之君而臨乎其上也則恩義之厚孰重於此此愛敬之心故不愛其親而愛他人者謂之悖德不敬

其親而敬他人者謂之悖禮以順則逆民無則焉不

在於善而皆在於凶德雖得之君子不貴也

德主愛禮主敬愛敬之心原於

一本故必愛敬其親而後推以愛敬他人者則於德禮不悖而謂之順若不愛敬其親而先愛敬他人則於德禮也悖矣悖則謂之逆立教者將以順示則而先以應順者而逆行之民又何所取法乎夫順則爲善而吉逆則爲不居於善而皆居於凶德舍愛敬之善

君子則不然言思可道

行思可樂德義可尊作事可法容止可觀進退可度

以臨其民是以其民畏而愛之則而象之故能成其

德教而行其政令

君子則順而不逆所貴者推愛敬其親之心以及他人則本原之地先正故其愛敬之心發之而爲言必思可道而後言言無不信矣愛

敬之心措之而爲行必思可樂而後行行無不悅矣由此而立德行義不違正道故可尊由此而制作事業動得物宜故可法推之於容止則威儀必合規矩而可觀推之於進退則動靜不違禮法而可度如是

則立身行道處世接物之間無非愛敬即無非德禮以此臨御其民民皆視其威如神明儼然人望而畏之親其德如父母藹然咸慕而愛之法其端範而日思倣象之上順以率下下順以效上故德教成而敬令行又何待於嚴肅哉是章前言人人皆有此愛敬之心而聖人獨能自盡後言聖人因皆有愛敬之心而教之使各隨分自盡由此觀之聖人之德無加於孝益明矣詩云淑人君子其儀不忒詩曾風鴈鳩篇引此以見淑人君子威嚴不差爲人法則者皆本於孝也

紀孝行章第十

此章紀孝子事親之行有當盡者五當戒者三

子曰孝子之事親也居則致其敬養則致其樂病則致其憂喪則致其哀祭則致其嚴五者備矣然後能事親人子能事其親而稱孝者於平居之時當致其恭敬起居飲食必加虔謹如昏定晨省出告反面雙雙齋懌者是也奉養之時當盡其歡樂承顏順志無所拂逆所謂有深愛者必有和氣婉容是也父母有疾則當盡其憂豈惟醫藥必備湯藥必親如行不翔言不惰色容不勝衣不解帶者是也若親喪亡則盡誠盡禮擗踊哭泣終其哀情若春秋祭祀則誠敬齋戒防其嗜欲訖其邪物致其嚴肅備此五者則生事喪祭無一不盡其愛敬之心然後爲能盡事親之道也夫人之一身心爲之主士有百行孝爲之原爲人子者誠以愛親爲心而不忘事親之孝常有以致其敬則敬存而心存遇養則樂遇病則憂遇喪則哀遇祭則嚴然則

事親者居上不驕爲下不亂在醜不

爭居上而驕則亡爲下而亂則刑在醜而爭則兵三

者不除。雖日用三牲之養，猶爲不孝也。

事親者既有五要，又有三戒。居人上，則當莊敬以臨。

下而不可驕於爲人下，則當恭謹以事上而不可悖亂。在醜類則當和順以處衆而不可爭忿。蓋善事親者常以父母爲心，謹慎持躬不敢有一毫之失，則驕亂爭三者其所必無也。非然者居上而驕於自恃，則危亡之禍隨之爲下而悖亂不馴，則刑辟之罪皆及之。在醜而爭忿不平，則兵刃之害加之矣。以上三者皆危身取禍，憂及其親之事。於守身安親之道未有當也。若不能除，雖日用三牲之養，不可謂不厚矣。然終必毀傷身體，遺父母憂，污累名行，爲父母辱，不可謂之孝也。可見孝不徒在口腹之養，而貴在守身爲人子者可不戒哉。

五刑章第十一

此章言五刑以不孝爲大，蓋明刑所以弼教也。

子曰：五刑之屬三千，而罪莫大於不孝。

五刑，墨、劓、剕、宮、大辟也。五刑之屬，其條有三千之多。

而罪之大者莫過於不孝，蓋刑以糾不孝之人，則民皆上德而無不孝之子，是教典資於刑也。

要君者無上，非聖人者無法。

非孝者無親，此大亂之道也。

人生莫大於君親，道法莫尊於聖人。君者，臣下所稟命而恭敬以從之者也。乃敢要脅之，是無所稟命而恭敬以從之者也。乃敢要脅之，是無

上也。聖人制禮作樂傳之萬世而共遵者也。乃敢非毀之，是無法也。爲人子者當行孝道以事二親，天理人倫之極則也。而敢非毀之，是無親也。夫人之一身，君治之師明聖道以教之，父母生之，所謂民生於三也。若不忠於君，不則於聖，不愛於親，三者有一於此，皆罪惡之極。大亂之道也。刑必加之而不孝之罪與要君非聖等，故罪莫大於不孝也。孝足以治，不孝足以亂。孝之所關誠重矣哉。

廣要道章第十二

此章廣言首章要道之義。

子曰。教民親愛。莫善於孝。教民禮順。莫善於悌。移風易俗。莫善於樂。安上治民。莫善於禮。

治平之道。莫先於教。教民之道。必順其心。故教民相親相愛。無

有善於事親之孝者。以孝爲親愛之本也。教民有禮而順。莫有善於悌者。以悌乃禮順之首也。若德因樂而章。欲轉移民風。變易民俗。莫善於樂。以其感最神。而和人心也。名分因禮而辨。欲安上之位。而下以治民。莫善於禮。以其辨上下而定民志也。夫孝弟禮樂。爲教民之道。然弟者孝之易行者也。禮者序此者也。樂者和此者也。四者舉其要而言之。實一本也。然則聖人所以爲教之本。誠約而易操也哉。

禮

者敬而已矣。故敬其父則子悅。敬其兄則弟悅。敬其君則臣悅。敬一人而千萬人悅。所敬者寡而悅者眾。

此之謂要道也。

前言孝弟禮樂皆可教民。至此又申言禮教之功效也。禮以敬爲主。禮非敬不生。則敬者禮之本。所以行孝也。父母於子一體而生。愛易能而敬難

盡。其所以有序而和者。未有不由於敬而能之也。故由其效而推言之。上自敬其父。而天下之爲子者。皆悅以事父。上自敬其兄。而天下之爲弟者。皆悅以事兄。上自敬其君。而天下之爲臣者。皆止一人而悅。乃千萬人敬者至少。而悅者至眾。所持者至約。而天下之道。已該括而無遺矣。蓋敬父敬兄。敬君之心。原人心之所同具。所以君好民從。舉一而包萬者。其本一也。天下國家本於身。身本於親。事親孝則九族睦。而四海準。故立愛自親始。立敬自長始。達之天下。各親其親。各長其長。而天下平。守約而施博。通可達在茲。故曰要道也。

廣至德章第十三

此章廣言首章至德之義